

Vakeriben pal miro rom

Sar somas terňi - akana mange imar eňavardeš the ochto berš -, al'e akor somas bari frajerka. O murša andal amaro romano gavoro pašal mande chuťkerenas, sar te bi somas varesavi raňi. Jekh sako tosara užarelas, kana ušťava, u gil'avelas zakamad'i gil'i, aver mange sako tosara hordinelas mek taťi peki marikl'i žiroha u o koktavo mange o kvitki pre oblaka mukelas.

Miro dad, o Emil'is, len tradelas, varekana the pal o kana chudenas le dadestar, al'e th'avka peske na dine smirom. Mange has šmišno, al'e mukavas len sako tosara marikl'i na has špatno, aňi kvitkici, choča koja gil'ori mange džalas pro nervi, bo o čavo na gi l'avlas mištes, al'e so - asavas.

Jekhvareste avl'a andro gav jekh čoro Rom, kujdušis. Mangelas le Romendar chabenoro u na has les kaj te sovel. O Roma andro gav na has barvale, al'e na has aňi čorore – th'avka les ňiko na diňa te chal. Miro dad has jileskero u il'a les andre amaro kher, diňa les te chal u kerd'a leske o than pro phusa.

O kujdušis k'amende ačhil'a. Na has man phral, samas trin pheňa u me somas nekphureder, vaš oda has o dad rado, hoj leske vareko šigitinla la but'aha. Miro dad kerlas chart'iko but'i u koda kujdušis sikhad'a, hoj hino but'akero. So amenge al'e na džalas pre god'i, hoj o Rom hordinelas kajso gerekos, kaj leske na dičholas andro muj. Na phučahas lestar, soske pes garuvel, bo has lačo manuš, a gondol'inahas, hoj pes ladžal, bo hino džungalo.

Avka pregel'a jepaš berš u savore les igen rado dikhahas, bo has igen lačo manuš. Pal e but'i peha phirahas te kidel la babake o drabi u varekana phirelas manca pal o gav, choc te aver Roma the o terne, so pal mande phirenas, lestar asanas. O dad has rado, bo džanelas, hoj pes mange ňič na ačhola. Jekhvar tosara o kujdušis ušťila u phend'a, hoj imar musaj te džal durededer. Phare jileha leske thod'am pro drom chabenoro u jov gejl'a peskere dromeha.

Gondol'inavas pre leste, has mange pharo, bo peske pre leste prisikhl'il'om. Kavka jekhvar, sar pre leste gondol'inavas, ta ňisostar ňič predal o gavoro džal baro barikano verdan štare parne grajenca u zaačhil'a paš amaro kher. Andale verdan avl'a avri kajso šukar terno u barvalo Rom, barikanes urdo u džalas takoj pal miro dad. Miro dad les diňa paťiv u koda Rom leske phend'a, ko hino, u soske pestar kerelas kudušis. Phend'a, hoj o džuvl'ija les kamenas ča vaš oda, hoj hino barvalo, ta kamelas te džanel, či les vareko šaj rado dikhel, choc te hino čororo. Miro dad les lošaha il'a phikendar. Pal'is mandar o Robertos phučl'a, či les lava romeske, hoj man but kamel u hoj prindžard'a, hoj som la čejileskri. Somas igen bachtal'i, bo les tiš bares kamavas. Il'am pes u sam peha, rado amen dikhas, šukare čhaven kerd'am u som rado, kaj sa ada predžidžil'om.